

MIEMBRO DI PARLAMENTO PA E PARTIDO DI M.E.P. SR. LUIS S. DE CUBA TA CONTESTA CARTA DI SR. ROBERTICO R. CROES, PARLAMENTARIO DI PARTIDO AVP

ORANJESTAD (IPA-MG)
Segun sr. Luis de Cuba, miembro di Parlamento di Fraccion di M.E.P.: "Awe dia 15 di Juli 1993, mi a ricibi bo carta, cual contenido ta referi na mi discurso na Radio Canal 90 FM dia 13 di Juli 1993, den programa di Partido Politico M.E.P."

Lo mi contesta segun contenido di bo carta:

A. Ariba e asunto cu mi ta un politico nobo, mi kier a informa bo, cu ta desde aña 1985 mi ta aparecé ariba lista di e prestigioso partido politico M.E.P. ariba invitacion di nos gran lider en feliz memoria, sr. Gilberto François (Betico) croes.

B. Ariba asunto di "e politica di MEP di mentira, corrupcion y ladronicia", mi ta di opinion, cu si MEP ta loke bo ta bisa, anto bo deber como politico hoben, ciudadano y miembro di Parlamento, pa entrega keho un na Ministerio Publico, pa asina esnan cu ta culpable di corrupcion o ladronicia wordo persigui cu e man duro di nos sistema hudicial.

Sr. Croes, den e caso aki bo no mester hunga politica, pero usa bo deber cívico y actua.

Si bo no por haci esaki: anto bo mester stop di lanza calumnianan contra nos partido.

C. E asunto di cu "e garantianan, no a costa nos pueblo te cu awe ni un cent preto", lo siguiente.

Esaki ta berdad, pasobra Gobierno di Aruba a nenga di paga tur e cobranzanan cu ta sumando mas di 100 miyon dolar, pendiente di resultado di e investigacionnan, cu ta andando.

Sr. Croes mi ta kere cu na su debido tempo, gobierno lo manda e documentonan aki pa Staten.

Cu e hecho cu otro hendenan a bai cu e placa, no ta kita afor cu Aruba lo tin di paga esaki.

D. Ariba e asunto cu "a pone

2000 amigo politico ariba payroll di Pueblo", mi kier a pidi sr. Croes pa tene un tiki mas pasenshi, ya cu pronto Staten lo haña e rapport di Controlaria General, den cual ta wordo ilustra cu ta 1200 hende a wordo nombra den gobierno den 4 aña di tempo.

Cu Gabinete Oduber, a base di recomendacionnan di departamentonan di gobierno, a yuda e personanan aki cu trabao, mi ta di acuerdo ya cu nunca mi por ta contra cu un tata di famia Arubiano haña un empleo na gobierno di Aruba.

E. Cu a paga sumanan fabuloso na un solo carrental, mi kier a pidi sr. Croes pa papia cu su colega Ex-Ministro di Finanzas di Gabinete Eman, ya cu e por duné cifranan fabuloso cu Gabinete Eman a paga na e mesun carrental aki.

F. E nomber cu bo persona kier duna na e medidanan cu gobierno kier tuma manera bo a yame "belasting di ladronicia" o "impuesto di ladronicia", mi ta di opinion cu e nomber aki por ta mas apropiada, pasobra si bo waak kiko a pasa den Beta Hotel, na unda expertonan ta bisa cu e valor di e edificio, manera cu e ta awor ta 25 miyon dolar y a wordo gasta 65 miyon dolar, cual ta garantiza

pa gobierno, anto mi tin di asumí, cu 40 miyon dolar a desaparecé of hortá.

Sr. Croes esaki ta LADRONICIA y mi a drenta arena politico, pa duna un aporte na nos pais Aruba, hibando un politica franco y sincero, teniendo cuenta cu deseonan di e pueblo di Aruba.

Mi no ta acepta ningun menaza di ningun hende o politico, manera bo a expresá den bo carta.

Lo mi keda obhetivo y si mester duna critica ariba maneho di cualkier gobierno, lo mi hacié, semper y cuando esaki ta na bienestar di nos pueblo.

Partido M.E.P. y mi persona, semper ta informa nos hendenan den tur barío di Aruba, e políticá cu partido ta hiba y si algun dia nos mester topa otro manera bo a stipulá den bo carta, mi lo no cobardia y lo mi sigui lucha pa loke mi pueblo y mi partido a dunami como mandato pa lucha

E rumbo di mi partido pa mas cu 22 aña semper ta y lo keda loke nos lidernan di barío, votadornan, militancia y Pueblo di Aruba exigi di nos.

Nos no ta un partido di famia y ni tampoco un partido di personanan cu ta kere cu nan ta mas inteligente cu tur hende na mundo.